

Orain dela hilabete bat Laudioko Udalaren eskutitza jaso genuen urtarrilean Gaztetxea desalojatzeko aginduekin. Azaroaren 18an, Udalarekin bildu ginen eta eskutitzeko agindua berretsi zigun. Urria hasieran Laudioko Lamuza Parkeko obrak hasi ziren eta obra horiek Laudioko Gaztetxeari eragingo diote bertan aurkitzen baita. Egun, obren inguruan oso informazio gutxi dugu, aspaldi eta informalki jasotakoa bakarrik. Lehenengo obra honetan urtebetez Kultur Etxeko teilatuak eta beirateak aldatzen ariuko omen dira. Denbora tarte horretan, Gaztetxea desalojatzeko agindua eman digute, eta gainera, Udalak, egindako bileran argi utzi zigun ez digula bermatuko bertara berriz bueltatuko garenik. Are gehiago, obrek iraungo duten tarte horretarako ere ez digute ezer eskaintzen, 18 urte eta gero, egun batetik bestera kalean utziko gaituzte. Beraz, defendatzen ez badugu Laudioko Gaztetxea urtarrilean 7an desalojatua izango da. Hau ordea, ez da kolektiboki eta elkarlanean aritzen den eragile baten aurkako EAJk eta PSOEk osatzen duten udalaren lehenengo eraso. Udan, beste hainbat eragileekin batera osatzen dugun Txosna Batzordearen aurka oldartu baitzen udal autoritario hau eta horrek legeagintaldi honen norabidea argitu zigun.

Laudioko okupazio mugimenduaren historia luzea da, aspalditik datorrena eta gaur egun bi espazio nagusi izatea ahalbidetu duena, biak 2001ekoak: Laudioko Gaztetxea eta Orbeko Etxea hain zuzen ere. Urkijoko Markesen kapera zaharra Laudioko Gaztetxea izan da azkeneko 18 urte hauetan. Hasiera batean, okupazio mugimenduaren eskaerei erantzunez udalak kapera zaharra kontratu bidez utzi zion Gazte Asanbladari, baina kontratu hori 2005etik iraungita aurkitzen da. Laudioko Gazte Asanblada izan da denbora horretan autonomia osoz espazio horren kudeatzaile nagusia, beste eragile batzuen laguntza eta elkarlanarekin batera. Laudioko Gaztetxea belaunaldiz belaunaldi gazte eta ez hain gazteen topaleku izan da, komunitate politiko sendo bat egikaritzuz eta erreferentzia handi bat irabaziz. Hainbat izan dira burutako ekimen eta ekintzak gazteriarren despolitizazio egoera antolakuntza erraminten bitartez gainditzeko: hitzaldiak, jardunaldiak, tailerrak, mintegiak... Hortaz gain, azken urteetan Laudioko Gaztetxea maila nazionaleko zenbait ekimenentzat azpiegitura garrantzitsua izan da.

Berriz ere Aiaraldea albiste dugu. Krisiak gogor kolpatu du eskualdea eta 2019 hau bereziki. Uztailean gazte bat eraila izan zen Tubacex enpresan, handik hilabete batzuetara bigarren langile bat; eskualdeko hainbat lantokietan kaleratzeak: Artiach eta Berriako langileen mobilizazioak; eta batez ere, egunerokoan pairatzen dugun bizitzaren proletarizazio latza. Gertakizun hauek guztiak ezin dira era isolatuan ulertu, ezta gaztetxearen desalojoa ere. Ofentsiba kapitalista baten aurrean aurkitzen gara, zeinetan langileon interesen aurkako eraso bortitzak gauzatzen ari diren, soilik klase borroka terminoetan kokatu daitezkeenak. Horregatik Gaztetxeen garrantzia, kapitalari eta instituzio autoritarioei espazioak birjabetzea eta langileon mesedetara jartzea etorkizun beltz honi aurre egitea delako. Era berean, behar beharrezkoak dira Erraki bezalako babes sareak, bakardadearen inpotentzia gainditu eta elkartasunaren bitartez indartzen gaituztelako.

Hau guztia dela eta, dei egiten dizuegu **abenduaren 4an 18.30etan** Gaztetxe aurrean burutuko dugun agerraldira. Herri honek gaztetxe baten beharra du gazte langileon interesei erantzuteko eta antolakuntza gaitasunak indartzen jarraitzeko. Gaztetxea defendatzea eta EAJ-PSOEk osatzen duten udal autoritarioaren aurrean tinko mantentzea dagokigu, ez baitugu onartuko militantzia politikoaren aurkako inolako erasorik, ezta guk gestionatzen ditugun espazioen aurkako erasorik ere.

GORA LAUDIOKO GAZTETXEA!